

6

AD
MAGNIFICVM
Et Spectatissimum Virum Domi-
num IOHANNEM CIRENBERGIUM
PROCONSULEM CIVITATIS
GEDANENSIS.

Ob Acceptum Synodaliū Epistolārum
(Concilij Basileensis) aulicorum sigillo eiusdem in
plumbum impresso obsignatum, quod nobilissimus
Dominus THOMAS ROE Eques Auratus,
Serenissimi Magnae Britanniae Regis Legatus,
ab eo sibi prius officiosè oblatum, Oxoniensib. Bib-
liotheca transmissit ac dono dedit.



CARMEN
HONORARIVM.

OXONIAE,
Excudebat IOHANNES LICHFIELD,
Almae Academiae Typographus,
Anno Dom. 1631.



CLARISSIMO
DOCTISSIMOQVE

VIRO D. JOANNI

CIRENBERGIO

Dantiscano.

PRæclare nobiscum agitur, (Optime Cirenbergi) nec vno nomine felix *Bodleiana* nostra, quæ Te quoq; benefactorem nacta est. Existimabam Illustrissimum Dominum D. Th. 7^o Serenissimi Regis nostri legatum, cum superiori anno triginta selectissima volumina manu exarata nobis dono misisset, hæc subsistere voluisse. Sed avaritia quædam (vt videtur) vel in pietate est, & ferè sui similis, hoc est modum nescit. Non contentus o-

pimis Græciæ spolijs, quibus ad invidiam vsq;
armarium nostrum locupletâisset: Germaniæ
quoq; bibliothecas excutit,

---*Trahit quodcumq; potest atq; addit acervo,*
& eodem tempore, cum legatione Regiâ si-
mul defungitur Academicâ. Placeret affectus
nobilissimi alumni, vel vndecunq; hæc litera-
ria subsidia conquisiisset: sed cum Te, tantum
virum, Dantisci agentem, qui doctissimus
audis, & acerrimus Orthodoxæ religionis
propugnator, nobis amicum conciliauerit:
id adeo præter spem & supra quàm dici po-
test omnibus gratum accidit, vt prius oppri-
mi munere quàm sentire benignitatem nobis
videremur. Memini ante aliquot annos cum
ex Italiâ rediens Basileam pertransirem, inter
alia egregia illius vrbis monumenta, quæ tum
cupide perlustraui, me perductum à doctissi-
mo theologo Iacobo Grinæo *tp̄ manager* ad
Ædem sacram in qua Patres illius Concilij
confedissent; Incredibile est quantam ex illius
loci contemplatione voluptatem cepi: vt-
pote in quo Episcopi nostrates suffragia tulif-
sent: sed venturū aliquando eum diem, in quo
Epistolas Synodales Authentico Sigillo cōmu-
nitas,

nitās, non vsurparem oculis modò, sed & ipse
in peculio Bodleiano percererem, ne per
somnia quidem potui cogitare. Augurium
fortasse, quod hodiernus dies eventu compro-
bavit. Atq; hoc (quantum quantum) Tibi
(vir Doctrissime) acceptum ferimus, qui tam
rarum monumentum è Scrinijs tuis exire, &
in Angliam nostram trajcere passus es.
Quod quanti nos faciamus, si tibi in mentem
venerit rogare, non dubitamus respondere,
immortalitati commendatum esse, vel si mau-
lis, (quod tamen perinde) inter pretiosa
Bibliothecæ *καμβλιν* recondi, vbi nusquam
gentium vel securiùs, vel magis ad vtilitatem
publicam libri reponuntur. In hæc tantùm
(vir præstantissime) te compellare audebam
vale, & (nisi displicet) habe inter cultores
Tui obseruantissimos

I. ROVS *Academia Oxon:*
Bibliothecarium.



AD
CLARISSIMVM
DOMINVM IOAN:
NEM CIRENBERGIVM,

Sacræ Antiquitatis Assertorem
celeberrimum.

PRæteritum Cirenbergi qui retrahis ævum,
Abdita dum revocas post longi obliuia tractûs;
Qui celeris mansura Sēis vestigia servans,
Caluitiem Historiâ supple, quas pectore pleno
Fundemus laudes? Te cæca volumina rerum
Saturniq; fugas, veluti Custode, tenente,
Ter vivit mortale genus; dum posthuma classis,
Non contenta suæ præsentī lumine tædæ,
Defunctis miscetur Avis, sortemq; Nepotum
Prævidet, hos animo versans ex lege Priorum.
Eminus (ô quales reddit Prudentia Ianos!)
Vtrumq; inspicimus mundum: quò tendimus annos,
Vltra natales nati, post funera vivi!
Dij sumus, & nullo spatij discrimine Tempus

Omne

Omne datur præsens! Non his in laudibus inum est,
 Quod quum sollicito veteres conamine nugas
 Dilquirant alij, monumenti mortua verba
 Semesalsq; notas, torvoq; nomismate cæsam
 Cæsaris Effigiem, Priameio pollice tritum
 Cratera, vnciolas Ephesinæ ex Æde Dianæ;
 Antiquas veræ Tu Religionis Idæas,
 Sanctorum consulta Patrum, quæcunq; perennem
 Instaurant Vitam, tu morte exempta refundis.
 Non Clauos,, Lignumue Crucis, suspiria Christi
 Vitriolo inclusa, aut Guttam de Lacte Mariæ,
 Baptistæ quintumue Caput, paucosue Capillos
 Petri, quæ vendit meretrix Ecclesia vulgo:
 Sed certa, vtilia, & nullis castrata lituris,
 Nec mutata dolis, nec spuria stramine misto.

Basileense tuæ thesaurus Bibliothecæ
 Decretum vt nostras divinitus appulit oras,
 Traducente pio Musarum Vindice Röö,
 (Röö, cui grates nostras numerabit Arena,) R. 10
 Obstuper Oxonium; nunc Te, nunc cogitat Illum,
 Nunc Scriptis inhiat, voluit, manibusq; Sigillum
 Contrectat; non sola fidem convivia Blattæ
His faciunt; hac prima manus quod virginis pennâ
 Et natalitio sacraverit atramento,
 En Testis Legalis adest; Plumbi ecce Figura!
 Quæ credas spirare Patres, & vivere verba.

At Te, cui tantæ veneranda Oracula cura,
 Petri Petram aliam, Sancti Patremq; Senatûs
 Iactamus; Christi œconomum, qui credita ponens
 Nunc sponsam Christi Chartis dotalibus auges.

Nos ergo, Libri viventes, pectore firmo

Te sculptum retinemus; & alta mente precamur,
Nomen vt Autographo æternum tibi perftet in illo,
Quod nemo excubuit, quod rodit nulla vetustas.

G VILIELMVS STRODVVS ex *Aede Christi,*
Oxonienſis Academia Orator Publicus.

I O H A N N I C I R E N B E R G I O viro inclyto &
ob conſervatum ſuâ operâ Concilij Baſileenſis
auſpicio, cum de toto orbe Literario,
tum maximè de Academia Ox-
on. optimè merito.

S Vſcipe, Britannis ad Te quæ venit ab oris
Muſa, *Cirenbergi*, juſtæq; hanc laudis acerram
Exiguam geſtat; quòd ſi propiora rogâris,
Oxonium hoc nôris advectum Carmine, & omnes
Quas nutrit Phœboq; Iovi; Academia Nymphas.

Nos & (*Pembrochij* pignus) Monumenta *Barocci*
Legimus, & Rôî cupido luſtramus oculo
Munera, ab Eoo tranſvecta Volumina Phœbo.
At nuſquam eſt noſter quo ſe plus jactat Apollo
Quàm, quòd CONCILII Calamo duo ſæcula paſſo
Deſcriptum *Archetypon* monſtrat, Rôoq; Tibiq;
Imputat alternans, & gaudet utroq;. Triumphant
Bodleij cineres, & honori ſerinia plaudunt;
Vicerunt tandem invidiam quoq;. Diphthera priſci
Si veniat Iovis, aut Phœnicum prima tabella,
Aut Folium à Cumis, aut Nili docta papyrus,
Non his Membranis contenderit. Vt juvat iras

Pontificum, & cæcos sub Religione furores,
 Fulmina; , fraudesq; , metusq; , minasq; Latini
Eugenij, & Reges mitrata in Bella vocatos
 Cominus aspicere; & nulli jam fidere Prælo !
 Non Expurgantis rabiem hic vnguesq; timere
 Indicis, heu metuenda bonis Scriptoribus arma !

Æternæ Pelles , cumq; ipso Sepia mundo
 Victura, & quovis Plumbum pretiosius auro,
 Cætera perpetuo doctum firmare Sigillo,
 Quis, quibus è tenebris qua vos ex clade redempta
 Servavit nobis Genius ? dederatq; ferenda
 Trans flatus Boreæ , gelido sub cardine Mundi
 Ultima quæ positos complectitur vlna Borussos
 Tethyos, atq; Helice sublimi circuit astro?
 Certè his non Artes olim, non notus Apollo
 Sedibus, horrebant Vrbes, latèq; sonabant
 Sarmaticis campi frænis, Scythicisq; sagittis.
 Fallor ? An hinc, Phœbo invisi, infestiq; , ruebant
 Cimmerii, & toties cultum exundabat in orbem
 Iam conjuratus Musas extinguere Gotrus ?
 Omnipotens Tempus, tuq; imperiosa vetustas,
 Hoc operis vestri est, vestræ miracula dextræ
 Cernimus. hoc jam ipso postremæ in margine Terræ
 Phœbus, & Aoniæ posuere sedilia Nymphæ.

O Claræ laurus, cortinaq; Delphica, Lympha
 Castalis, & Cythæ sacri Crissæq; recessus,
 Et nemus Asteris, contextaq; cornibus ara;
 Fûgit vester honos: quid jam non credere fas sit ?
 Ecce ! Helicon vacat, & Mæandri flumina Cygni
 Deseruere, silent Lycij vada garrula Xanthi,

Græcia

Græcia Barbariæ nupsit: sua magnus Apollo
 Transtulit arma, arcumq; , lyramq; : novemq; Sorores
 Secum ad Sauromatas duxit, pictosq; Agathyrsos;
 Atq; alium Geticis Parnassum invenit in agris.
 Huc & Cecropiâ migravit Pallas ab arce
 Exul, & Arcadiæ præpes modulator avenæ.
 Hic Tripodes nunc, & Phœbi incunabula Delos.
 Hinc prisca Autorum gaudent Monumenta renasci,
 Sive novis properanda Typis, & paginâ æœna,
 Sive fide calami lentè emendanda vetusti.

Maſte *Cirenbergi*; hanc laudem Patriæq; Tibiq;
 Perpetuam præſtes, & fauſti ſideris urbem
 Protege Conſiliis ſtudiisq; ornato *Gedanum*.
 Noſtua, dum Thamifis clementibus alluet vndis
 Oxonium, & longis erroribus *Iſſula* major
 Sarmaticum prono propellet gurgite Pontum,
 Dumq; coronabit Rhenum Baſilea ſuperbum,
 Et mente, & gratâ recolemus nomina famâ.

THOMAS MASTER, *Art. Magiſter & Collegi*
Novi apud Oxonienses Socius.

Clarifſimo viro Domino IOANNI
 CIRENBERGO.

NOn perdidisti pignoris laudem tui
 (Pomerane celebris) ne time pelagi minas
 Fluſusq; decimos; tutus emerſit liber;
 Avidaq; dextra capitur; & geſtit ſimul
 Hunc intueri tota Pieridum cohors,

Voluit, revolvit paginas, nullo satis
 Contenta studio, paginâ nullâ satis.
 At quos honores grata meditatur tibi?
 Tam liberali quid parit dignum manu
 Fæcunda pietas? Ecce Castalios lacus
 Pleno refundens alveo, numerôs parit,
 Versumq; mittit, grandius tentans nihil.
 Sic illa cæli memorat Heroas sui.
 Sic illa laudes grata Bodleij canit,
 Tuasq; (Savili;) sic & Historiam tuam
 (Camdene) pensat. Tale monumentum dedit,
 Sacer Iacobi quando tegetetur cinis.
 Celebratq; meritum carmiue exili Tuum
 (Generose Cirenberge, patriæ stellula.)
 Micabis inter fulgidas Britonum faces
 Rutilante radio; dumq; erit libris honos,
 Dum præminebit firma Bodleij domus,
 Te nulla nubes, nulla fuligo premet.

R. OWEN *In Artib. Mag. è Coll.*
Orielenſi Socius apud Oxonienses.

Ad Clarissimum

IOHANNEM CIRENBERGIVM *Dantiſcanum, qui*
Baſileenſis concilij Autographon pulcherrimè
conſcriptum dono ædidi Inſigniſſimo
 THOMÆ ROE *Equiti Aurato,*
quod hic denudò Bibliotheca
Oxonienſi tranſmiſit.

Antiquæ Synodi Pater vocande,
 Ac Libro Reuerendior vetuſto;

Donasti.

Donasti sacrosanctius Volumen;
Augnſtum *Meriti* tui volumen.

In quo Lucidus Ordo ſyllabarum

Ornatu coeuntium venuſto,

Et pulcher typus, & placens character,

Et chartæ niveus decor politæ

Affundunt quaſi *Lumen*, vt Legantur.

Nullo in margine ſqualor, aut Lituræ,

Aut veſtigia *pollicis madentis*;

Annos ſi numeres, putes trecentos:

Si ſpectes *faciem*, putes nec vnum.

Per discrimina temporis relapſi,

Creuit *gloria* non Libri Senectus.

At quæ ſcrinia Codiciſvè ciſta,

Quam nec blatta perederit nec *avum*?

Ex tali *ſtatuum* Faber *metallo*

Efforma, ſtatuum Librum tuentis.

Debetur Tibi Codiciſ ſenectæ:

Qui vitam Patribus, Pater ſecundus;

Qui Libro tribuis, Secundus *Autor*.

Per Te reſpicimus velut *coavi*

Retro ſæcula redditosq; Patres.

Libros tollite, *præla* quos recudunt:

Errato numeroſiore plenos;

Purgans pagina maius his volumen.

Inverſæ reſupinus ordo vocis,

Discors ſchedula ſchedulæ ſequenti,

Multi codice codices in vno

Tam ſenſu vario trahunt legentem;

Vt farragine diſcolor volumen

Sit visum quasi *multiplex* nec *unum*,
 Mox confer geminos simul Libellos;
 Autorem geminum putes nec ipsum.

At Tu prototypo Liber nitore,
 Tu sculptus quasi *gemmeo lapillo*,
 Fugisti maculis inusta præla.
 Hoc in Codice si putandus *Error*,
 Nudam fallere crede veritatem,
 Fiat fabula *Sanctus & Senatus*.

Esto Lima Typographis futura.
 Nusquam fragmina paginae minoris,
 Aut vultus mutili vocabulorum,
 Nusquam aggesta *parenthesis*, vel auctus
 Commento vitiosiore textus.

Tam fidus Synodi tenor peractæ;
 Vt iam nec Synodum putes peractam.
 Ergo fundite gratias, Poetæ:
 Roo fundite gratias Patrono;
 Qui mundi volitans plagas per omnes,
 Non Linguas mage quam Libros reportat.
 Qui cum notior Indiæ sit Indo,
 Nullis advena, non tamen locorum
 Libros pinxerit aut leues *Tabellas*;
 Visit Climara, fiat vt Patronus;
 At nulli (*Pomerane*) quam *Gedano*
 Terras *Oxonij* magis ligauit.

RICHARDVS BVSBY in Artibus
 Baccalaureus ex *Ade Christi*
 apud *Oxonienfes*.

IOANNI

IOANNI CIRENBERGIO
Clarissimo.

Datus & Sigillatus! Placet, Nam *Syngraphæ*
Sub formula hac ad nos *Cirenbergi* Tuum.

Oportuit librum venire, qui potest
Sic *obligare*. Quàm superbiunt Opum
Musæ suarum conscia, quoties Tuum
Bodleia moles pandit *Archetypum*! Placet,
Nam *Literarum* iure veneramur notas
Vetustiores: altiùs *Typographicis*
Scriptæ Figuræ mentibus nostris sedent,
Et exaratrix Penna Prælo stat prior,
Honore tantum, sæculis quantum prior.
Hæc imperante ducta sub manu, graue
Opus gradatim cudit, & pretium sibi
Lucratur ex labore: dum Prælum leui
Impressione deuenustatos Libros
Quasi prostitutos prodit, & Lectoribus
Persuadet ipsis negligentia legi
Istos eadem posse qua solent premi.

Vt *Advenarum turba* concurrat frequens!
Pars ista Titulo postulat librum suo,
Pars illa nomine hæret in Tuo. Placet.
Vterq; utriq; sic enim famam parem
Præstat: perennem Munus Authorem facit
Authorq; Munus, Ipse victurus Libro,
Genioq; rursus Ille victurus tuo.

Vt invident Hostes reponi *Scrinijs*
Nostris volumen, Roma quod cupit suum.

Nec

Nec possidet! Placet vel illud: Sic enim
 Torquere Romam te decet, pium impiam,
 Donoq; provocare qui vita potes.
 At interim Nemo beneficio pares
 Meditatur isti gratias; leues Tibi
 Agrestiorum parturimus Carminum
 Ineptias! Heu illud illud non placet.
 Iterumne Musæ literas Illi darent
 Qui literas Musis dedit? Retributio
 Infusa! Spectatur Amor in Folio Tuus,
 Et noster in Quarto redit? Retributio
 Truncata! Misisti Librum veterem, grauem;
 Novum, Poëticum feres? Retributio
 Nulla! Ergo quisquis hæc legit sic sentiat,
 Fecisse Te fieret vt *Obligatio*,
 Fecisse Nos vt *Vniuersi noverint*.

THOMAS GAWEN Oxoniensis,
 è Collegio Novo.

Spectatissimo Viro D^o IOANNI CIRENBERGIO

Dantiscano ab acceptum Basileensis Concilij

Aulicæ, ex Ipsius Conseruantis, No-

bilissimi THOMÆ ROE

donantis beneficio.

S Ancte liber, quo fit Synodus sibi præsta superstes,
 Cujus virgineos ostendit pagina textus,
 Archetypasq; refert, prælo mirante, figuras:
 Tu facis, vt certo non cedat dextera prælo,

Nec

Nec calamus sit voce minor, collataq; scriptis
 Lingua tuis taceat. Tam clare litera spirat,
 Tam certis vivunt expressa vocabula formis,
 Ut membrana loqui credatur, pennaq; verbis
 Inseuissse sonum, Lectoreq; audire figuras.

Ceu te non solum textus mysteria, ceu te
 Docta *Cirenbergi* seruarunt scrinia tutum;
 Post tot, quae merito faciant te, saecula, Patrem,
 Totus ades, nec te violatur longa verustas;
 Sed juvenem librum, nostro quoq; tempore natum
 Spiranti primus mentitur imagine vultus.

Nec textus solum nobis monumenta ministrat;
 Erudiet docto lectorem Bulla metallo
 Pendula, quae signata, fidem pia scripta meretur;
 Instruet & plumbuni, poterisq; citare sigillum.

Miratur Criticus veterum fragmenta librorum,
 Quos Mus *Perspicuas*, & rodit blatta *Disertos*,
 Quos monumenta facit solum imperfectio sensus.
 Nimirum vacuae delecta vocabula chartae,
 Et revocata placet laesi expiratio verbi.

Scire juvat, quod charta tacet; juvat addere sensum.
 Sic semesa novis dubiis dum verba resarcit,
 Scriptorem superat, sic fit, dum corrigit, Author.

At non prototypi cineres, horrorue libelli,
 Aut laceri superest tibi sola voluminis umbra;
 Emendare potest Criticum tua pagina, cujus
 Vllatamen pars docta foret, sanctaeq; ruinae
 Sufficerent Libro. Nec Te laudauerit aetas,
 Aut annosa dies; Ipsis Oracula cunis
 Te tua fecerunt priscum, saeculumq; dederunt.

Et veneranda fuit tibi sub Scriptore senectus.

Semper eris reliquis Mens prima, & regula libris,
Cujus ad exemplar, correctæ volumina sano
Nascentur textu; prælum nec polluet error;
Nec dubias pariet sensus discordia lines.

Dic quis Te dederit; quis tanti Muneris Author?

Quis Vaticanam dono transmiserit vno?
Magna *Cirenbergi* laus hinc tibi, gloria magna
Inde Rōo petitur, dubio certamine munus
Dicat uterq; suum, sed nec Liber iste minores
Authores meruit; numerofo munere crescens
Non potuit semel Iste dari. Quæ serinia, clausis
Dantiscane tuis, tam rara volumina donent,
Ut monumenta Rōus credat; qui nec novus Indus,
Nec loca quæ nobis pingunt incognita Mappæ.
Mitte librum ignoto scriptum sermone, character
Sit dubius, simul et mutas scriptura lituras,
Interpres Rōus vnus erit, commercia Mundo
Cujus lingua facit, Cujusq; vno ore loquuntur
Tot gentes, totus cui patria dicitur Orbis.

JASPER MAINE, in Art. Baccalanreus, &c.

Adæ Christi apud Oxonienses.

Ad Clarissimum Virum, Dominum IOANNEM

CIRENBERGIUM, Antiquitatis

Vindicem

SIC sic verendos Romuli vultus stupet
Serus Senatus; Sic Numæ sanctum caput
Horrens in auro, Martis dubio colunt

Stupore

Stupore Cives ; & superducens novos
 Post fata cultus, efficit timide pios
 Senex metallum. Cernit antiquos libros
 Foelix Gedanum; quosque suspexit dul
 Præli in fluento mundus, illi mi videt
 In fonte calami. Nomine hoc vno bene
 Antiquiores audiunt, quoniam Tuas
 Curas merentur; atq; virtutis loco est
 Tibi placere. Ducis è tenebris Patres
 Longum sepultos: posthumum reddis diem,
 Agiliq; longas injicis fuso moras,
 Patrumq; Pater es. Membra laceri corporis,
 Vagamq; plebem partium in sedes suas
 Piè reponis: Vt ille Scriptor nece
 Vel ex ruinâ pulchrior surgit suâ;
 Repullulantis lætius fati bonum
 Periisse factum est: Nil peregerunt Dea
 Solertiore stamina rotantes manu;
 Priore vixit sæculo, floret Tuo.

Parum est quod vnam gente de quavis sibi
 Statuerit urbem Romulus: Curis tuis
 Angustiore scrinio mixtae jacent
 Tot poenè gentes, quot libri, & sedes replet
 Melior popellus: atq; Musæum Tuum
 Sphæræ Archimedis simile, parua machina est,
 Sed foeta mundo, sed polo incluso tumens,
 Suoq; cælo. Primulos monstrans libros
 Dicas licebit, Has Pater duxit notas,
 Has ad lucernam paginas fessus senex
 Tremante dextrâ scripsit: Incerta interim

Variq; nobis lectio mentem trahit,
 Dúbialque rixas ciet, & author sapiens
 Authore in ipso quaeritur. Vivas precor
 Caput sacratum Sæculis, fias viris
 Spirans volumen ipse, In exemplum, precor
 Vnus legaris posteris : Qui sic colis
 Antiquoris sæculi exesos viros,
 Nunquam senescas. Congruum prorsus foret
 Ut qui profundo liberas alios sinu,
 Farumque pellis, munda tutus vice,
 Nec fata videas, nec situm noscas Tuum.

GVLIELMVS CARTWRIGHT, ex *Ad*

Christi, Oxoniensis.

Ad IOANNEM CIRENBERGIUM

Dantiscanum Virum Clariss.

mum, Ode.

Fœcunda Dantiscum bonis
 Beata frugum civitas,
 E proximo dives mari,
 Sed merce nullâ ditior,
 Quàm quod Cirenbergi parens,
 Fruges tot antiquas simul
 Messesq; literarias
 Mores & antiquos magis
 Et scripta paucis obvia
 Et codicum Gémmas foues,
 Quas ille raras vndiq;

Non

Non æstimator frivolus,
 Omni redemptas è situ &
 Suo exhumatas pulvere
 Contraxit in penum suam,
 (Quâ non cluet quæsitior:)
 Ipsiq; jam certat libris
 Quis literarum sit magis
 Illine an Ille armarium.

At non repostis fordidus
 Possessor incumbit bonis,
 Vniq; doctus est sibi,
 Dam noq; nostro abscondita
 Pretium scientiæ adstruit
 Ut priscus audiat sophos.
 Odi genus morosulum
 Queis mysticum est quicquid sciunt,
 Qui sic silentio truces
 Signant premuntq; chartulas,
 Defossa qui scripta eruunt
 Inventa quo lateant magis
 Qui semper à populo cavent.

Quid stipiti indocto interest:
 Fraude eruditus publicâ?
 Vniq; damnans capsulæ
 Quæ debet omnibus bona?
 Scientia populi est opes.
 Malo innocenter barbarum,
 Quàm qui malignè sic edit
 Suos (tinea) libellulos
 Et neminem ad partes vocat.

(Sit hæc avarities licet
 Haud literatis insolens,
 Tantoque peior hic lues
 Quo pejus aurum literis.)
 Non sic *Cirenbergi* manus
 Constringit has tenax opes,
 Privasq; delicias facit,
 Sed hospitales literas;
 Foresq; non clausas suæ
 Domûs, perinde ac pectoris,
 Nostrumq; Musæum colit,
 Quò quisq; lector advena
 Conviva gratus accubet
 Vnâq; decerpat: parum est
 Ni Xenia tollat insuper,
 Dum ne quid hospiti neget
 Soli sibi negat sua,
 Solum hîc negare sustinet:
 Emitq; queis careat lubens,
 Ideoq; , quò careat, emit.
 Voluminum lectissima
 Idemq; maximè in suis
 Fruitur quod & aliis dedit:
 Nos esse dum mavult suos
 Totis vel emptos scriniis:
 Nescire contentus quoq;
 (Quæ se ire soli fas erat)
 Ne nesciantur publicè;
 Quàm candida ignorantia!
 Stat semper Oxonia rea

Non

Non æstimandi muneris ,
Archiva dum lustrat sua,
Ibiq; Concilium tuum,
Quod maluisti tu omnium,
Volumen instar millium,
In sanctiori nidulo,
Ipsis vel Archivis decus :
Gratâq; linguâ prædicat
Nomen *Cirenbergi*, & librum ,
Vnumq; plus Nomen libro.

IO: EARLES *Art. Mag. Collegij Mertonensis.*
Socius, Oxoniensis.

